


## Fenomena Cuaca Panas Melampau



PULAU PINANG

TAKUNGAN air di Empangan Teluk Bahang, Pulau Pinang kelihatan semakin susut semalam ekoran cuaca panas dan kering disebabkan fenomena El Nino yang kini melanda negara ini.



PAHANG

PENTERNAK ikan air tawar, Abdul Manap Khalid Ahamad melihat keadaan kolam di Kampung Pandan Dua, Kuantan yang kering akibat cuaca panas luar biasa.



MELAKA

SEBUAH traktor menggemburkan tanah sawah yang terlalu kering akibat kemarau di Kampung Tedong Merlimau, Melaka semalam.

# MOSTI sahkan suhu maksimum 35 darjah Celsius dicatatkan lima hari berturut-turut 6 kawasan catat suhu tertinggi

KOSMO  
18/3/16  
ms 6

**KUALA LUMPUR** – Enam kawasan iaitu Chuping di Perlis; Alor Setar, Kedah; Ipoh dan Lubuk Merbau di Perak serta Batu Embun dan Temerloh di Pahang dikenal pasti mencapai paras gelombang haba sejak semalam ekoran fenomena El Nino.

Menteri Sains, Teknologi dan Inovasi (MOSTI), Datuk Seri Madius Tangau berkata, fenomena El Nino itu merupakan keragaman iklim yang berlaku secara tidak tetap dalam tempoh dua hingga tujuh tahun.

“Keadaan cuaca panas ini boleh mencetuskan gelombang haba, iaitu situasi yang membawa risiko kesihatan hipeter-

mia atau strok haba dan dehidrasi.

“Enam kawasan itu dikesan mengalami paras gelombang haba iaitu suhu tertinggi harian (suhu maksimum) telah mencapai 35 darjah Celsius untuk lima hari berturut-turut. Ia juga melebihi 2 darjah Celsius daripada purata jangka panjang suhu maksimum,” katanya pada sidang akhbar selepas melancarkan Majlis Penyerahan Kit Rumah Program Komuniti Bebas Denggi di Perpustakaan Kuala Lumpur di sini semalam.

Turut hadir, Timbalan Ketua



MADIUS

Setiausaha (Sains) MOSTI, Prof. Madya Dr. Ramzah Dambul dan Pengasas yang juga Pengerusi EntoGenex Industries Sdn. Bhd., Tunku Naquiyuddin Ibni Tuan-ku Ja'far.

Dalam pada itu, Madius memberitahu, MOSTI bersama Kementerian Sumber Asli dan Alam Sekitar buat pertama kalinya akan menubuhkan satu jawatankuasa khas tetap bagi menangani isu cuaca panas yang melanda negara ketika ini.

“Persediaan sedang dilakukan untuk membentangkan perkara

itu kepada Kabinet pada Jumaat ini (hari ini) dan panduan akan diperoleh sama ada MOSTI atau Kementerian Sumber Asli dan Alam Sekitar akan bertindak sebagai peneraju bagi jawatan kuasa khas tersebut.

“MOSTI akan memberi sumbangan dari segi teknologi dan sains dalam menghadapi cuaca sebegini di masa hadapan selain memantau keadaan cuaca semasa memandangkan Jabatan Meteorologi Malaysia adalah di bawah seliaan kementerian kami,” katanya lagi.

Mengulas mengenai Program Komuniti Bebas Denggi, Madius berkata, sebanyak 100,000 Kit Rumah Perlindungan Leng-

kap Denggi akan diagihkan kepada rumah-rumah terpilih di Selangor, Kuala Lumpur, Johor, Negeri Sembilan, Melaka dan Putrajaya bagi fasa kedua program berkenaan.

Setiap kit rumah itu mengandungi 30 gram Mousticide (produk membunuh larva nyamuk), sebotol 500 milimeter krim penghalau serangga Denduarad, seunit Ovitrap (peralatan untuk mengesan populasi nyamuk) dan risalah.

Sejak dilancarkan Jun tahun lalu, berlaku penurunan sebanyak 49 peratus bagi kes denggi di kawasan terlibat dan ia akan terus diperluaskan di kawasan lain pada masa depan.